

BUSINESS Info Newsletter

DECEMBAR 2019 // BROJ 81

U ovom broju, između ostalog, čitajte:

- **Predsjedavajući Vijeća ministara BiH sa poslodavcima: Dogovoreno formiranje pet radnih grupa za pomoć domaćoj privredi**
- **Zasjedalo ESV FBiH**
- **Do novog zakona o PDV-u u saradnji sa udruženjima poslodavaca FBiH i RS-a**
- **Poslodavci iz FBiH i RS-a razgovarali o unapređenju poslovnog ambijenta**
- **Pravilnik o izmjenama i dopunama Pravilnika o primjeni Zakona o PDV-u nije riješio pitanje poreznog priznavanja troškova amortizacije za imovinu u najam**
- **Sastanak Radne grupe za pojednostavljenje procedura prikupljanja statističkih podataka**



Predsjedavajući VM sa poslodavcima: Dogovoreno formiranje pet radnih grupa za pomoć domaćoj privredi



Predsjedavajući Vijeća ministara BiH Zoran Tegeltija razgovarao je 27. decembra 2019. godine u Sarajevu sa članovima delegacija Udruženja poslodavaca FBiH i Unije udruženja poslodavaca RS o načinima zaštite domaće proizvodnje i privrednika.

"Uspjeh BiH bez poslodavaca nije moguć. Onoliko koliko oni budu uspješni i koliko budu radili toliko BiH ima prepostavke za rast i razvoj. Ja i moji saradnici smo ponudili da budemo njihovi partneri", rekao je Tegeltija nakon sastanka.

Dogovoreno je formiranje pet radnih



grupa koje će se baviti prvenstveno zaštitom domaće privrede, zakonom o PDV-u, javnim nabavkama, oblašću saobraćaja i ravnopravnih odnosa.

Tokom sastanka je razgovarano i o prijedlogu zakona o PDV-u, s posebnim fokusom na mogućnost da se privrednicima da više prostora kada je u pitanju plaćanje PDV-a institucijama BiH, odnosno da se omogući produženje roka plaćanja PDV-a.



Tokom sastanka poseban akcenat stavljen je i na rad nedjeljom u oba entiteta te je zaključak da tu odluku trebalo donose lokalne zajednice, a ne Vijeće ministara. Stav poslodavaca je da je to odluka o kojoj se treba dobro promisliti obzirom da bi to donijelo gubitke u privredi i smanjenje radnih mesta.

Tegeltija je ubijeđen da će uspjeh privrede biti vidljiv kroz plate i rast životnog standarda građana.

On je najavio izradu zajedničkog dokumenta poslovne zajednice, Vijeća ministara BiH i vlada entiteta koji će biti izraz zajedničkih ciljeva, ali i predstavljati spisak obaveza u narednom periodu.



Zasjedalo Ekonomsko-socijalno vijeće FBiH



Nakon više od dvije godine pauze u radu Ekonomsko-socijalnog vijeća Federacije BiH to tijelo 05. decembra 2019. godine je zasjedalo u Mostaru.

Predsjednik Ekonomsko-socijalnog vijeća Edhem Biber podsjetio je da je zadnja sjednica ESV-a održana u oktobru 2017. godine.

"Nakon toga nismo održavali sjednice, ali smo radili neke druge stvari i danas smo se konačno okupili kako bismo u punom kapacitetu donijeli određene zaključke za svaku točku dnevnog reda te da ih onda predstavimo javnosti", kazao je Biber.

Na dnevnom redu sjednice ESV-a su konstituiranje Ekonomsko-socijalnog vijeća FBiH, Zakon o ustupanju radnika po prijedlogu Udruženja poslodavaca FBiH, Zakon o izmjenama i dopunama Zakona o poreznoj upravi FBiH po prijedlogu UPFBiH te Zakon o izmjenama i dopunama Zakona o porezu na dobit.

Premijer Federacije BiH Fadil Novalić uoči početka sjednice istaknuo je kako socijalni dijalog nema alternativu.

"Socijalni dijalog priješko nam je potreban i s obzirom da imamo određeni zaostatak u našem radu već sljedeće sedmice ćemo ponovno imati sjednicu ESV-a FBiH, jer teme koje su na današnjem dnevnom redu su jako bitne i ne mogu čekati", kazao je premijer Novalić.

Predsjednik Samostalnog sindikata državnih službenika i nameštenika FBiH Samir Kurtović kazao je kako radnici dvije godine nisu imali svoje predstavnike u ESV-u što je sada konačno promijenjeno.

"Ovo je deblokada Ekonomsko-socijalnog vijeća i prilika da jednostavno otpočnemo dijalog sa socijalnim partnerima, a posebno s Vladom FBiH i Udruženjem poslodavaca FBiH. Istaknuo bih također kako je od 17 reprezentativnih sindikata koji su potpisali Sporazum o formiranju Ekonomsko-socijalnog vijeća FBiH, danas njih sedam prisutno i sigurno ćemo biti i kritičari i davati dobre prijedloge, a sve u interesu zaštite radnika. Radnici napokon imaju sindikat i svoje predstavnike u ESV-u koje će u narednom periodu sigurno i kvalitetno zastupati", poručio je Kurtović.



Direktor UPFBiH Mladen Pandurević kazao je kako poslodavci pozdravljaju činjenicu da ESV FBiH nakon 25 mjeseci nastavlja s radom.

"Mislim da su sva tri socijalna partnera i društvo u cjelini osjetili činjenicu da ESV nije radio, ali bih rekao da su poslodavci imali najveću štetu. Mislim da ćemo u budućem periodu dokazati da smo spremni razgovarati i pregovarati isključivo na bazi argumenata i da ćemo prilikom zaštite svojih interesa poštovati i interese drugih strana koje će s nama sjediti za stolom", kazao je Pandurević.

Do novog zakona o PDV-u u saradnji sa udruženjima poslodavaca FBiH i RS-a



Predstavnici Udruženja poslodavaca Federacije BiH i Unije udruženja poslodavaca Republike Srpske razgovarali su sa čelnicima Uprave za indirektno oporezivanje Bosne i Hercegovine.

Na sastanku je postignut visok stepen saglasnosti i izražena potreba za dalnjom saradnjom i izgradnjom partnerskih odnosa između UIO Bosne i Hercegovine i udruženja poslodavaca.

Direktor UIOBiH Miro Džakula naglasio je da je Uprava ključna institucija za fiskalnu stabilnost svih nivoa vlasti i da su otvoreni za razgovore sa svima onima koji uredno izvršavaju svoje carinske i PDV obveze.



On je izrazio podršku zahtjevima poslodavaca da se novim zakonom o PDV-u regulira da se datum uplate PDV-a pomjeri na zadnji dan u mjesecu, što je europska praksa, a da se pomjeranje datuma uplate vrši sukcesivno kako bi se ne bi dovela u pitanje finansijska likvidnost entiteta.

prizna samo onim obvezniicima koji su uplatili fakture.

Također prihvaćen je kao opravdan zahtjev poslodavaca da se cenzus za PDV oporezivanje umjesto predloženih 75.000 KM, podigne na 100.000 KM.

Predstavnici udruženja poslodavaca i UIOBiH usaglasili su se da postoji problem plaćanja PDV-a za obrte i mala preduzeća i da je potrebno u novom zakonu o PDV-u ponuditi rješenja koja će u ovu kategoriju staviti u ravnopravan položaj sa drugim PDV obveznicima, u smislu naplate PDV-a prema naplati potraživanja.



Zajednički je konstatirano da je ostvaren napredak u pojednostavljivanju poreskih i carinskih procedura, ali da je potrebno raditi na dalnjem pojednostavljivanju kako bi se izbjegla nepotrebna administriranja.

Poslodavci su ocijenili pozitivnim uvođenje elektronskog unosa knjiga upisanih računa (KUF) i izlaznih računa (KIF) i elektronsko podnošenje prijava PDV-a. Direktor UIOBiH je izrazio spremnost da pruži stručnu pomoć poslodavcima u argumentiranju njihovih opravdanih zahtjeva prema državnim organima, nadležnim za donošenje zakonske regulative u oblasti indirektnih poreza.

Poslodavci iz FBiH i RS-a razgovarali o unapređenju poslovnog ambijenta



Delegacije Udruženja poslodavaca Federacije Bosne i Hercegovine i Unije udruženja poslodavaca Republike Srpske predvođene predsjednicima Adnanom Smailbegovićem i Sašom Trišićem i direktorima Mladenom Pandurevićem i Sašom Ačićem na sastanku u Banjoj Luci, održanom 18. decembra 2019. godine, razgovarale su o saradnji na unapređenju poslovnog ambijenta u interesu poslodavaca.

Na sastanku je konstatirano da postoji cijeli niz pitanja čije je rješavanje u interesu poslodavaca iz cijele BiH i gdje je nužno definirati zajedničke stavove udruženja poslodavaca, poput oblasti indirektnih poreza, carina, uvoza i izvoza itd.

Također je dogovoreno da sastanci i dogовори o djelovanju prema nadležnim institucijama održavaju redovno u narednom periodu, s ciljem kreiranja što kvalitetnijeg poslovnog ambijenta za poslovanje.

Naredni sastanak delegacija, kako je najavljeni iz Udruženja poslodavaca FBiH, trebao bi se održati već u februaru naredne godine, najvjerojatnije u Sarajevu.

Druga sjednica ESV-a FBiH

Sjednica Ekonomsko-socijalnog vijeća FBiH održana je 12. decembra 2019. godine u zgradи Vlade Federacije Bosne i Hercegovine na kojoj su socijalni partneri raspravljali o Zakonu o reprezentativnosti sindikata i udruženja poslodavaca i analizi metodologije za izračun, utvrđivanje i usklađivanje najniže plaće.

Zakonom o izmjenama i dopunama Zakona o radu u Federaciji BiH (Službene novine FBiH br. 89/18 od 29.10.2018. godine) propisuje se obaveza Vlade FBiH da, na prijedlog Federalnog ministarstva finansija, u saradnji sa Federalnim zavodom za programiranje razvoja, a uz prethodne konsultacije sa Ekonomsko-socijalnim vijećem, doneše propis kojim će se propisati metodologija izračuna i usklađivanja najniže plaće.

Ovaj dokument ima za cilj da predstavi osnovne probleme u oblasti reguliranja najniže plaće, ponudi analizu adekvatnosti visine postojeće utvrđene najniže plaće, predloži način utvrđivanja nivoa najniže plaće korištenjem matematičke formule kao jednog od elemenata za donošenje konačne odluke o visini najniže plaće, i na kraju da predloži način usklađivanja iste u skladu sa socioekonomskim i tržišnim uslovima u BiH.

Kada je u pitanju Zakon o reprezentativnosti sindikata i udruženja poslodavaca, on uređuje kriterije i postupak utvrđivanja reprezentativnosti, ovlaštenja, postupak preispitivanja utvrđene reprezentativnosti i druga pitanja od značaja za postupak utvrđivanja reprezentativnosti sindikata i udruženja poslodavaca, ako drugim zakonom nije određeno drugačije.

Podrška BHT1 i FTV realizaciji projekta dodjele nagrade „Emerik Blum“



Predstavnici Udruženja poslodavaca Federacije Bosne i Hercegovine predvođeni direktorom Mladenom Pandurevićem održali su pripremne sastanke sa čelnim ljudima BHT1 i FTV Belminom Karamehmedovićem i Džemalom Šabićem o organizovanju dodjele nagrade "Emerik Blum" za najboljeg biznismena u FBiH.

Predložena je zajednička saradnja na realizaciji ovog značajnog projekta, koji bi trebao dodatno doprinijeti pozicioniranju Sarajeva i BiH kao regionalnog centra biznisa.

Čelnici BHT i FTV izrazili su punu podršku realizaciji ovog projekta i naglasili spremnost da na raspolaganje stave tehničke i programske resurse s ciljem uspješne realizacije projekta dodjele nagrade „Emerik Blum“ najboljem biznismenu FBiH.

Pravilnik o izmjenama i dopunama Pravilnika o primjeni zakona o porezu usklađen sa novim standardom MFSI 16

Udruženje poslodavaca Federacije Bosne i Hercegovine uputilo je krajem novembra Ministarstvu finansija FBiH inicijativu za izmjene i dopune Zakona o porezu na dobit, jer je od 1. januara 2019. godine u Federaciji BiH u obaveznoj primjeni novi računovodstveni standard, MFSI 16 - "Najmovi", čijim stupanjem na snagu je nestala razlika između priznavanja finansijskog i operativnog najma kod najmoprimeca.



Primjenom novog Standarda, najmoprimec više neće knjižiti u svojim poslovnim knjigama trošak operativnog najma. Ugovaranjem unajmljivanja putem operativnog najma, najmoprimec će knjižiti sredstvo sa pravom korištenja i dugoročnu finansijsku obavezu za cjelokupni period trajanja ugovora.

Knjiženo sredstvo sa pravom korištenja će se amortizovati tokom vijeka trajanja ugovora o najmu. Vremenska vrijednost novca, za koju je diskontovana obaveza za najam za cjelokupni period trajanja ugovora o najmu, knjižiti će se na kontu finansijskih rashoda (kamata) u knjigama najmoprimeca, prema mjesečnom obračunu kamate. Stoga, dosadašnji trošak najma kod najmoprimeca zamijeniti će trošak amortizacije i kamate.

Imajući u vidu trenutne odredbe Zakona o porezu na dobit, amortizacija je priznat trošak isključivo ukoliko se radi o sredstvima u vlasništvu poreznog obaveznika. S tim u vezi,

Udruženje je tražilo hitne izmjene odredbi Zakona o porezu na dobit u FBiH, kojim bi se regulisao porezni tretman amortizacije sredstava koja će se primjenom MSFI 16 naći u knjigama najmoprimca.

Međutim, zbog lakših procedura izmjena i stupanja na snagu podzakonski akata, Ministarstvo finansija Federacije BiH je inicijativu Udruženja poslodavaca FBiH, do donošenja izmjena i dopuna pomenutog zakona, ugradila u Pravilnik o izmjenama i dopunama Pravilnika o primjeni Zakona o porezu na dobit.



Odnosno, izmjenama Pravilnika briše se stav 7 člana 42 koji glasi: "Trošak amortizacije na iznajmljenu imovinu priznaje se zavisno od toga da li se takva imovina računovodstveno tretira kao sredstvo zakupodavca ili kao sredstvo zakupoprimeca, u skladu sa MRS 17 - Liznig. Ukoliko bi se takva imovina iskazivala

i amortizirala i kod zakupodavca i kod zakupoprimeca, amortizacija se priznaje samo kod onoga koji tu imovinu i njenu amortizaciju iskazuje u skladu sa MRS 17."

Pravilnik o izmjenama i dopunama Pravilna o primjeni Zakona o porezu na dobit možete pročitati [OVDJE](#).

Pravilnik o izmjenama i dopunama Pravilnika o primjeni Zakona o PDV-u nije riješio pitanje poreznog priznavanja troškova amortizacije za imovinu u najam



Sastanak predstavnika Udruženja poslodavaca FBiH, Vijeća stranih investitora BiH i Privredne komore FBiH održan je 27. decembra 2019. godine na kojem se razgovaralo o primjeni MSFI 16 standarda „Najmovi“ i o izmjeni Pravilnika o izmjenama i dopunama Pravilnika o primjeni Zakona o PDV-u.

Sastaknu su također prisustvovali i finansijski direktori velikih kompanija članica UPFBiH, predstavnici revizorskih kuća, kao i samostalni računovođe i revizori koji su članovi Saveza računovođa i revizora u FBiH.

Nime, uvođenjem novog standarda MSFI 16 „Najmovi“ sredstva uzeta pod operativnim najmom više nemaju tretman troška već stalnog sredstva. Na ovaj način poslodavci su neopravdano izloženi troškovima obzirom da ministarstvo nije pristupilo izmjeni Zakona o porezu na dobit već pitanje poreznog priznavanja troškova amortizacije za imovinu u najmu pokušalo riješiti izmjenom Pravilnika.



Na sastanku je istaknuto da se navedenim pravilnikom nije riješen problem poreznog priznavanja troškova amortizacija obzirom da je to zakonska materija, te da se treba pristupiti izmjeni člana 19. Zakona o porezu na dobit kojim se definiše ovo pitanje.

Na sastanku je zaključeno da će ove tri organizacije pripremiti zajedničku inicijativu za izmjenu zakona i dostaviti je Ministarstvu finansija FBiH.

Sastanak Radne grupe za pojednostavljenje procedura prikupljanja statističkih podataka



U prostorijama Federalnog zavoda za statistiku 26. decembra 2019. godine održan je sastanak Radne grupe za pojednostavljenje procedura prikupljanja statističkih podataka koju čine predstavnici Udruženja poslodavaca FBiH i Federalnog zavoda.

Naime, Udruženje poslodavaca FBiH je početkom novembra iniciralo sastanak sa direktorom Zavoda za statistiku FBiH Emirom Kremićem na kojem je usaglašeno da se zajednički radi na provedbi Odluke Ustavnog suda Bosne i Hercegovine iz 2009. godine s ciljem donošenja novog zakona o statistici FBiH i na kojem je donesena odluka o formiranju Radne grupe.

Članovi Radne grupe su razgovarali o načinu pojednostavljenja procedura prikupljanja statističkih podataka, a kako bi se izbjeglo sada prisutno dostavljanje podataka prema različitim osnovama, što dodatno opterećuje privredne subjekte. Istaknuto je da je neophodno uspostaviti sistem koji će omogućiti Federalnom zavodu za statistiku prikupljanje podataka od iz administrativnih izvora, a samo one podatke koji se ne mogu prikupiti na takav način zatražiti od privrednih subjekata. Ovakav način rada u velikoj mjeri olakšao bi rad Zavodu za statistiku, a ujedno bi rasteretio privredne subjekte i olakšao njihovo posovanje.

Članovi Radne grupe ispred Udruženja poslodavaca će za naredni sastanak predložiti tri obrasca sa kojima privredni subjekti imaju poteškoće prilikom popunjavanja, kako bi se radilo na njihovom pojednostavljenju. Također, Udruženje poslodavaca FBiH će zatražiti sastanak sa predstvincima Finansijsko-informatičke agencije kako bi razgovarali o mogućnosti dostavljanja podataka od strane FIA-e Federalnom zavodu za statistiku.

Sastanak direktora UPFBiH i Centra Skenderije



Direktor Udruženja poslodavaca FBiH Mladen Pandurević održao je sredinom decembra sastanak sa direktorom KJP Centar „Skenderija“ d.o.o. Amerom Kapom, a kako bi razgovarali o modelima bude saradnje, odnosno realizaciji zajedničkih projekata.

Pandurević je istakao da je potrebno afirmisati i unaprijediti razvoj privrede u BiH i regiji.

Tokom sastanka istaknuta je mogućnost organizovanja sajmova, s ciljem umrežavanja, povezivanja i saradnje privrednika i jedinica lokalnih zajednica i jačanje privrednih kapaciteta.

U narednom periodu održat će se sastanak na kojem će se detaljnije razraditi ideje za organizovanje sajmova.

Ministarstvu finansija FBiH upućen tekst Nacrta zakona o jedinstvenom sistemu multilateralne kompenzacije i cesije

Udruženje poslodavaca FBiH je pripremilo i Ministarstvu finansija FBiH uputilo tekst Nacrta zakona o jedinstvenom sistemu multilateralne kompenzacije i cesije.

Udruženje poslodavaca FBiH kao jednu od mjer za poboljšanje likvidnosti predlaže uvođenje sistema multilateralne kompenzacije i cesije u FBiH po uzoru na sistem u RS-u. Predloženo je da organizator bude Finansijsko-informatičke agencije, a neophodno je razviti odgovarajući softver, odnosno elektronsku platformu, na kojoj bi privredni subjekti mogli registrovati svoja dugovanja i potraživanja.




Zakonom o multilateralnim kompenzacijama bi se naložilo svim privrednim subjektima u FBiH obaveza prijavljivanja potraživanja i obaveza, te slobodno učešće u sistemu multilateralnih kompenzacija. Na taj način bi se konačno stekao realan uvid u stanje duga realnog i javnog sektora.

Donošenje ovog zakona ima za cilj smanjenje javne potrošnje, bolje punjenje budžeta o vanbudžetskih fondova, održavanje nivoa zaposlenosti i smanjenje cijena poslovanja.

Tekst je pripremila Radna grupa Udruženja poslodavaca FBiH u kojoj su učestvovali i vanjski eksperti iz ove oblasti, odnosno pravnici, advokati, kao i predstavnici Finansijsko-informatičke agencije.

Tekst Nacrta zakona možete pogledati [OVDJE.](#)

Objavljeno Uputstvo o dostavljanju podataka iz knjigovodstvenih evidencija elektronskim putem



U Službenom glasniku Bosne i Hercegovine objavljeno je Uputstvo o dostavljanju podataka iz knjigovodstvenih evidencija elektronskim putem kojim se određuje ko može da dostavi podatke, rokovi za dostavljanje podataka, kao i prava i obaveze obaveznika indirektnih poreza i Uprave za indirektno oporezivanje u vezi sa dostavljanjem podataka iz knjigovodstvenih evidencija elektronskim putem.

Naime, krajem novembra, predstavnici Udruženja poslodavaca Federacije Bosne i Hercegovine i Uprave za indirektno oporezivanje Bosne i Hercegovine održali su sastanak na kojem su razgovarali o nacrtu pomenutog uputstva na kojem su predstavnici Uprave predstavili zakonski osnov za donošenje Uputstva, njegovu svrhu, te pojasnili svaki član pojedinačno.

Tada je, na testnoj platformi, predstavljen i način elektronskog podnošenja evidencija o

nabavkama i isporukama.

Cilj donošenja Uputstva je da se olakša komunikacija sa obaveznicima i smanji broj ograničenih provjera, budući da će Uprava za indirektno oporezivanje BiH određene provjere raditi sistemski, bez ometanja redovnog poslovanja PDV obaveznika.

U pripremi je Tehničko uputstvo i Uprava ne očekuje da će obveznici imati poteškoće, niti veće troškove da svoje evidencije prilagode propisanom formatu.

Nakon objavlјivanja Uputstva dostavljanje knjigovodstvenih evidencija u prvoj godini bit će dobrovoljano, a od 2021. godine obavezno.

Predstavnici Udruženja poslodavca Federacije Bosne i Hercegovine ocijenili su donošenja Uputstva opravdanim, te naglasili da će Uputstvo olakšati poslovanje i smanjiti kontrole UIO. Napomenuto je da poslodavci neće imati dodatne obaveze već će samo prilagoditi postojeće evidencije koju su već vodili u svojim firmama, da većina poslodavaca neće imati dodatne troškove jer već imaju uspostavljena softverska rješenja, koje informatičari mogu u vrlo kratkom vremenu prilagoditi traženom formatu, te da se ne nameću dodatne obaveze u odnosu na obaveze koje su već propisane Zakonom i Pravilnikom.



Uputstvo možete preuzeti [OVDJE](#).

Održana sjednica UO Udruženja poslodavaca Kantona Sarajevo

Na sjednici Upravnog odbora Kantona Sarajevo, održanoj 16. decembra 2019. godine, članovi su najprije raspravljali o Nacrtu budžeta Kantona Sarajevo za 2020. godinu. Napomenuto je da u Nacrtu nije navedena odgovornost za raspodjelu grant sredstava, a naročito u načinu njihovog trošenja, te da treba postaviti jasne i precizne uslove za dodelu i utrošak grantova. Neophodno je razdvojiti grantove koji se dodjeljuju javim od onih koji se dodjelju privatnim preduzećima, a kako bi se firme koje donose novu vrijednost u Kantonu na stimulativan način ohrabre i ojačale. Članovi su također zaključili da u Budžet treba predvidjeti sredstva za nabavku opreme i mašina za izvođenje praktične nastave, kao i da se predvise sredstva za ojačanje kapaciteta Udruženja poslodavaca KS, a kako bi Udruženje imalo adekvatan prostor i uslove za rad. Zaključci će se iznijeti na sjednici Ekonomsko-socijalnog vijeća KS zakazanoj za 17. decembar 2019. godine.



Nadalje, članovi su razmatali Nacrt zakona o izmjenama i dopunama zakona o šumama. Predsjednik Upravnog odbora Safudin Čengić obavijestio je prisutne da je Skupština Kantona Sarajevo prihvatile inicijativu Udruženja poslodavaca Federacije BiH za ukidanje plaćanja naknade za opštekorisne funkcije šuma privrednim subjektima u KS-u, te da se Nacrt trenutno nalazi u javnoj raspravi. Članovi Upravnog odbora pozdravili su Zaključak Skupštine, te izrazili nadanje da je ovo početak aktivnosti za rasterećenje privrede od fiskalnih i parafiskalnih

nameta.



Upravni odbor je raspravljao i o Prijedlogu pravilika o izvođenju praktične nastave i laboratorijskog rada u srednjim školama na području Kantona Sarajevo. Zaključeno je da je u Pravilniku potrebno definisati osiguranje u slučaju nezgode prilikom izvođenja praktične nastave kod poslodavaca. U slučaju neželjenog

slučaja povrede poslodavac se stavlja u nezavidan položaj jer se sva odgovornost prebacuje na njega. Također, iako je Pravilnikom definisano da učenici sa poteškoćama u razvoju imaju pravo na pohađanje praktične nastave, neophodno je definisati i prisustvo mentora koji će voditi računa o takvim učenicima, kao i obaveznost prisustva učenika na praktičnoj nastavi koja se izvodi kod poslodavaca.

Upravni odbor će zatražit sastanak s ministricom za obrazovanje, nauku i mlade KS na kojem će se razgovarati o Nacrtu zakona o dualnom obrazovanju i Nacrtu pravilnika o izvođenju praktične nastave i laboratorijskog rada u srednjim školama na području Kantona Sarajevo. Poslodavci su istakli da žele učestovati u programu dualnog obrazovanja i izvođenju praktične nastave, ali i da je potrebno njihovo uključenje u kreiranju i donošenju zakonskih rješenja.

U nastavku sjednice, članovi su primili k znanju Nacrt zakona o izvršenju budžeta KS za 2020. godinu i dali saglasnosti na Nacrt zakona o Ekonomsko-socijalnom vijeću KS koji je trenutno u javnoj raspravi.

ESV KS podržalo Prijedlog budžeta KS za 2020.



Ekonomsko-socijalno vijeće za područje Kantona Sarajevo je na sjednici razmatralo više pitanja iz domena misije socijalnih partnera, s fokusom na Prijedlog budžeta KS za 2020. godinu i Prijedlog zakona o izvršenju budžeta KS za narednu godinu.

Referirajući se na ključne karakteristike budžeta, ministar finansija KS-a Amel Kovačević izjavio je uoči sjednice ESV-a kako Prijedlog budžeta KS-a za 2020. godinu 'donosi' gotovo 500 miliona KM investicija u različite projekte koji su u funkciji rješavanja ključnih problema s kojima se suočavaju građani Kantona.

Kako je istaknuo to se, prije svega, odnosi na rekonstrukciju i sanaciju javnog gradskog

prijevoza, odnosno GRAS-a i modernizaciju prateće infrastrukture, uključujući izgradnju saobraćajnih komunikacija poput prve, druge, devete i dvanaeste transferzale, te podrazumjeva stvaranje pretpostavki za čist grad i viši kvalitet života putem jačanja sigurnosnog sistema i ekoloških projekata.

Kovačević nadalje navodi, kako isti set mjera podrazumjeva unapređenje kvaliteta javnih usluga u KS-u u oblasti obrazovanja i zdravstva, a iz perspektive poslodavaca "značajno je da KS, prvi u državi, ukida parafiskalni namet, koji se zove 'općekorisna funkcija šume', a što znači da budžet 'preuzima' obavezu da se brine o upravljanju šuma iz postojećih sredstava".

Ocijenio je kako se radi o veoma kvalitetnom budžetu koji će pokrenuti investicione cikluse u KS-u, uključujući i druge biznise te stvaranje novih radnih mjesta, odnosno rješavanje problema građana KS-a.

Kantonalni ministar finansija je, istovremeno, podsjetio da je u odnosu na Nacrt budžeta za 2020. bilo manjih korekcija do kojih se došlo putem javne rasprave, a koje će biti prezentirane na sjednici Skupštine KS 26. decembra na kojoj bi osim budžeta za narednu trebao biti usvojen i rebalans Budžeta KS za 2019. godinu, što se, kako navodi, "dešava prvi put i rezultat je agilnog upravljanja u tom segmentu".

Važnost dviju tačaka dnevnog reda koje se odnose na budžet KS-a potcrtao je i predsjednik ESV-a KS Franjo Rener, koji je podsjetio kako je 21. decembar krajnji rok do kojeg bi Vlada KS trebala da odgovori na primjedbe i sugestije do kojih se dođe u sklopu javne rasprave.

Kazao je kako se u skladu s ranijim zaključkom, ESV obavezao da će o budžetu raspravljati u formi nacrta, prije nego što 'ode' na Skupštinu KS, navodeći da je danas prilika da članovi ESV-a iz prve ruke budu informirani od resornog ministra o rezultatima javne rasprave, budući da ovo vijeće nije dobilo spomenuti nacrt budžeta KS-a za narednu godinu.

Rener je dodao kako je na dnevnom redu sjednice i Nacrt zakona o izmjenama i dopunama Zakona o privremenom korišćenju javnih površina na području KS ("Službene novine KS", br: 20/04, 26/12 – Ispravka i 24/15), a što se odnosi na stvaranje zakonskog osnova za izgradnju/

otvaranje punionica za električna vozila.

Radi se o izmjenama koje jeinicirala Privredna komora FBiH, uz sugestiju da se to pitanje riješava u skraćenoj proceduri i u koordinaciji s jednicama lokalne uprave.

Predsjednik Skupštine Udruženja poslodavaca Nijaz Skenderagić kazao je kako je fokus poslodavaca na transparentnosti grantova, te poštivanju struke i određenih programa.

Ono što je, po njegovim riječima, posebno aktuelno iz perspektive poslodavaca jeste dio koji se tiče poticaja privredi/biznisu.

Skenderagić smatra da u tom pogledu treba osigurati puno više prostora da se firme koje donose novu vrijednost u KS-u na stimulativan način ohrabre i ojačaju.

Podsjetimo, zastupnici Skupštine Kantona Sarajevo usvojili su 19. novembra Nacrt budžeta za 2020. godinu koji iznosi 971.375.034 KM, nakon čega slijedi javna rasprava, te sjednica Skupštine KS, zakazana za 26. decembar.


Održan sastanak Tima za analizu i naknade Općine Bihać



Tim za analizu i naknade Općine Bihać, koji čine predstavnici Općine Bihać i Grupacije poslodavaca USK pri UPFBiH, održao je 13. decembra 2019. godine sastanak na kojem je prezentiran pregled administativnih i komunalnih taksi za područje Grada Bihaća u odnosu na sanski Most, Cazin, prijedor i Tešanj.

Prezentaciju je pripremila Služba za lokalni ekonomski razvoj Grada Bihaća.

Predstavnik Grupacije poslodavaca USK pri UPFBiH Edin Ibrahimpašić zahvalio se na iscrpnim informacijima te zatražio da se za sljedeći sastanak pripremi prezentacija u kojoj bi se naveli parametri po zonama, odnosno, koliko po zonama Grada Bihaća, od najmanje do najveće iznose takse. Zatraženo je također da se navedu pojedinačni iznosi adnministrativnih i komunalnih taksi, kao i sumirani prihodi po osnovu svih taksi.



FIA promovisala 13 knjiga pregleda finansijskih pokazatelja u FBiH



Posebno važan strateški cilj rada Finansisko-informatičke agencije Federacije Bosne i Hercegovine (FIA) je pretvaranje podataka prikupljenih u registrima u vrijedne informacije i znanja, neophodne za donošenje kvalificiranih i informiranih poslovnih i makroekonomskih odluka, naglašeno je na promociji trinaest knjiga finansijskih pokazatelja u Federaciji BiH, održane u Sarajevu 13. decembra 2019. godine.

U trinaest promoviranih knjiga su pregledi finansijskih pokazatelja koji su predstavljeni putem tabela i grafikona u kojima su adekvatno ilustrovani statički presjeci, strukturalni omjeri i dinamički presjeci, trendovi vremenskih serija, rezultata finansijskog poslovanja, kao i pokazatelja finansijskih performansi privrede u Federaciji BiH, kantonima, općinama i gradovima.

Zamjenica premijera i ministrica finansija FBiH Jelka Milićević kazala je da su u ovim knjigama predstavljeni najpouzdaniji podaci o broju zaposlenih, broju privrednih društava, ostvarenim prihodima itd.



„FIA je prva napravila pouzdanu bazu podataka za Federaciju BiH koja je u vlasništvu Federacije BiH. Zahvalni smo FIA za ove materijale koji su sjajna podloga za definiranje strateških investicija i donošenje odluka zasnovanih na pouzdanim podacima za sve razine vlasti, gospodarska društva, međunarodne institucije i investitore.", naglasila je ministrica Milićević.

Za poslovnu zajednicu u FBiH knjige finansijskih pokazatelja imaju kako direktnu, tako i indirektnu korist.



„Direktna je što na osnovu ovih podataka možemo pratiti kretanja u pojedinim djejalnostima, provjeravati podatke o sadašnjim i budućim poslovnim partnerima, pratiti trendove. Indirektna korist je što će ovi podaci biti korišteni od strane niza institucija, pomoći će smanjenju sive ekonomije i nadamo se u donošenju odluka od strane nadležnih o rasterećenju prirvede", rekao je direktor Udruženja poslodavaca FBiH Mladen Pandurević.

Direktor Finansisko-informatičke agencije FBiH Esad Mahmutović kazao je da je paralelno sa izradom ovih knjiga finansijskih pokazatelja urađen i software koji će omogućiti da ovi podaci već naredne 2020. godine budu dostupni institucijama, poslovnoj i akademskoj zajednici i svima zainteresiranim već krajem marta, odnosno, početkom aprila.

„Svih trinaest knjiga od danas je dostupno i online na web stranici FIA, www.fia.ba. No, mi u FIA se nećemo zaustaviti na ovome. Planiramo nastaviti raditi na formiranju registara koji će u značajnoj mjeri pomoći u kvalitetnijem odlučivanju. U planu je formiranje registara obrta, poljoprivrednih gazdinastava, grantova itd", najavio je direktor Mahmutović.



Ove knjige, u izdanju Finansijsko-informatičke agencije FBiH, predstavljaju rezultat nastojanja FIA da zauzme centralnu ulogu u kreiranju poslovnih registara sa relevantnim, izvornim podacima i pouzdanim informacijama u Federaciji Bosne i Hercegovine.

Pokazatelji finansijskog poslovanja u ovim knjigama su namijenjeni svim korisnicima koji imaju interes i bave se finansijskom i ekonomskom analizom i planiranjem.

Vjerujemo da će ove knjige biti od koristi najprije djelatnicima u makroekonomskom planiranju i upravljanju na svim nivoima društvenog uređenja, ali jednako tako i menadžmentu privrednih društava, poslovnim asocijacijama, predstavnicima medija, te stručnoj, naučnoj i istraživačkoj javnosti, kazali su iz FIA-e.

Nema biznisa bez inžinjerskih sadržaja



bi razmijenili ideje o unapređenju korištenja tehnologije u praksi, uključujući i najnovija rješenja koja su u funkciji poboljšanja kvaliteta života i ukupnog razvoja.

Podršku konferenciji i ove godine dalo je Udruženje poslodavaca FBiH, čiji je direktor Mladen Pandurević učestvovao na panelu "Gdje smo sada i kuda idemo".

- Bez novih ideja i novih tehnologija nije moguć napredak poduzetništva, a to, između ostalog, podrazumijeva interakciju između inžinjerstva, tehnologije i društvenih odnosa, kazao je Mladen Pandurević.

Direktor BH sedmica inžinjerstva 2019 Zlatko Berbić izjavio je da konferencija u Sarajevu slijedi nakon sličnih skupova u Tuzli i Banjoj Luci, te nakon više manjih događaja širom BiH.

- Inžinjerstvo je danas sveprisutno i najneposrednije povezano s razvojem i budućnošću i predstavlja svojevrsnu ulaznicu u svijet biznisa – naveo je Berbić.

Učesnici konferencije su putem predavanja i panel diskusija elaborirati niz zanimljivih tema kao što su pametna rješenja za pametni grad, transport, pametna javna uprava, Internet stvari (IoT), koncept "pametnih gradova".

Javni natječaj za kreditna sredstva u 2019. godini

Federalno ministarstvo razvoja, poduzetništva i obrta raspisalo je Javni natječaj za odabir korisnika kreditnih sredstava po Programu „Kreditni poticaj razvoja, poduzetništva i obrta“ za 2019. godinu.

Korisnici kredita su subjekti male privrede definisani po Zakonu o poticanju razvoja male privrede Federacije BiH i Zakonu o obrtu i srodnim djelatnostima čije je sjedište na području Federacije BiH, nalaze se u većinskom vlasništvu državljana BiH te imaju najmanje dva zaposlena na neodređeno vrijeme.

Kriteriji za utvrđivanje rang liste potencijalnih korisnika kredita su: vrsta djelatnosti, namjena utroška sredstava, povećanje zaposlenosti, izvori-način finansiranja, broj zaposlenih, ravnomjerniji regionalni razvoj (stepen razvijenosti JLS) i poticaji Federalnog ministarstva razvoja, poduzetništva i obrta u posljednjih pet godina.

Minimalan iznos kredita po korisniku može iznositi 20.000 KM, a maksimalan iznos kredita određen je u zavisnosti od broja zaposlenih osoba u subjektu male privrede i to na slijedeći način:

- do 250.000 KM za subjekte male privrede koji imaju od 2 do max. 9 zaposlenih,
- do 350.000 KM za subjekte male privrede koji imaju od 10 do max. 49 zaposlenih,
- do 500.000 KM za subjekte male privrede koji imaju od 50 do max. 249 zaposlenih.

Odobrena kreditna sredstva mogu se koristiti najmanje u 70%-tnom iznosu za finansiranje stalnih sredstava, a najviše 30% odobrenih kreditnih sredstava subjekti male privrede moći će koristiti za nabavku repromaterijala/sirovina.

Prijave se dostavljaju do 31.01.2020. godine (petak), odnosno prihvataju se prijave koje imaju poštanski pečat najkasnije sa navedenim datumom.

Dodatne informacije i potrebnu dokumentaciju preuzmite na [LINKU](#).

Poziv firmama iz privatnog sektora u BiH za slanje aplikacija za Nagradu za biznis lidera održivog razvoja 2020.

UNDP BiH, uz finansijsku podršku Vlade Švedske, po drugi put organizuje Nagradu za biznis lidere održivog razvoja u BiH.

Kao i prošle godine, Nagrada za biznis lidere održivog razvoja u BiH 2020 promovira aktivnosti privatnog sektora u oblasti održivog razvoja u Bosni i Hercegovini. Fokus ostaje na stvaranju kvalitetnih radnih mjesta i zaštiti okoliša, s tim da ove godine kroz proces aplikacije pokušavaju pomoći firmama da uvedu izvještavanje na osnovu standarda Globalne inicijative za izvještavanje (Global Reporting Initiative - GRI).

Naime, aplikacioni formular slijedi GRI standard, tako da na kraju procesa aplikacije firme dobijaju osnovu za svoj prvi godišnji izvještaj o stanju provedbe ciljeva održivog razvoja na nivou firme.

Također, ove godine kroz metodologiju Nagrade za biznis lidere održivog razvoja akcenat stavljuju na uticaj firmi u lancu vrijednosti i lokalnim zajednicama. Kroz ove fokuse će se identificirati biznis lideri održivog razvoja u Bosni i Hercegovini za 2020. godinu u dvije tematske oblasti, a to su "Ljudi" i "Resursi i okoliš".

Aplikacioni proces je počeo 15. decembra 2019. godine i trajat će do 1. marta 2020. godine. Nagrada je otvorena za mikro, mala, srednja i velika preduzeća registrovana u Bosni i Hercegovini.

Proces prijave je jednostavan i strukturiran je u dva koraka. Prvi korak se može završiti za manje od 30 minuta i daje ukupnu naznaku o statusu kompanije.

Više informacija i pristup obrascu za prijavu možete naći [OVDJE](#).

Našim članicama, prijateljima i poslovnim partnerima želimo sretne nastupajuće praznike i puno uspjeha u 2020. godini

UPFBIH





UDRUŽENJE POSLODAVACA

UDRUŽENJE POSLODAVACA FBiH

MULA MUSTAFE BAŠESKIJE 12/3, 71 000 SARAJEVO

TEL: 00 387 264 830

FAX: 00 387 33 552 461

MAIL: info@upfbih.ba

WEB: www.upfbih.ba